

LESONI NI MACAWA NI VOLA TABU 2020**ULUTAGA NI MACAWA: NA VOSA NI KALOU SA SOLIA NA BULA
KIVEI KEDA KECE SARA**

“Sa voleka sara (na Kalou) me vukei keda ni da sa rarawa” (Same 46:1b)

Utaga ni Vuli: Na Sala e Vakabula kina na Yalo Mavoia na Kalou

Vakamacala Taumada

“A noda i *drodro* kei na noda *kaukauwa* na Kalou, Sa voleka sara me vukei keda ni da sa rarawa.” (Same 46:1)

Na mala ni nona vosa na Daunisame oqo sa vakaibalebale vakalevu sara e Viti ni sotavi na leqa oqo na COVID 19 kei na oti ni kena laba na cagilaba o Harold ena noda vanua. Eda raica na vosa na “leqa” se “rarawa” ena dua na kena i vakarau vou ni da raica na vakacacani ni veitikitiko ena cagi kaukauwa oqo, ia eda raica tale ga na vosa “i drodro” kei na “kaukauwa” ena dua tale ga na kena i vakarau vou. Eda mai kila rawa ni veivosa oqo e sega walega ni ratou vakamacalataka na i tuvaki ni veika e tu e vuravura, ia na i tuvaki ni yalo ni tamata talega.

Na vosa e tolu oqo: “rarawa,” “i drodro,” kei na “kaukauwa,” e ratou uto tiko ni vakasama vakayalo ni macawa ni Vola Tabu ni 2020. Eda na raica na i talanoa kei Josefa ena (Vakatekivu 37-50), eda na raica na sala e dau muria na Kalou me vakabula kina na yalo mavoa. Me vakatekivu mai na i tekivu ni *vakararawataki* nei Josefa, na biliraki kei na vere me vakamatei kina, eda na sarava na nona yalodina na Kalou me *i drodro se i vakaruru* nei Jekope ena veiyabaki veivukiyaki ni nona bula, kei na vu ni *kaukauwa* vei koya ka levu cake mai na veika ca era yaco vei koya.

E rua tiko na vuna e digitaki kina nai ulutaga oqo ni vakabula yalo mavoa ena yabaki oqo. Ai matai, baleta ni sa vakamavoataka vakalevu na yalo ni tamata e Viti kei na Pasifika na cagilaba se leqa tubu-koso. Na vale kei na veitikitiko ena rawa ni tara tale, nai teitei ena rawa ni ra tei tale; ia na yalo e dau taura na gauna balavu duadua me mavo tale. Sa volai na veivaqa vakayalo oqo kina i soqosoqo lotu kei na tamata yadua era sa bula tiko mai na cagilaba kei na leqa tale eso ka ra gadreva na veivakayaloqataki mai na i Vosa ni Kalou ena nodra vakacoko tale tiko.

Kena i karua, na veivaqa vakayalo oqo ena wasei tiko kina eso na lesoni digitaki kei na vakasama titobu mai na Vuli ni Veiqaravi vei Ira era Vauci ena Mavoia ni Yalo kei na Tadoka ni Vakasama (Trauma Healing Workshop) ka veitokani tiko mai kina na i Soqosoqo ni Taba iVola Tabu (Bible Society) ena kena vakatavuvulitaki ena loma ni lima na yabaki sa oti. Na vuli oqo esa vakayacori oti mai na veivanua eso e Viti Levu, Vanua Levu, Ovalau, Yasawa, Valeniveivesu, valenivolavola ni Bible Society mai Vanuatu, ka sa vukei ira na tamata me ra vukei mai na mavoa ni yalo kei na tadoka na vakasama. E gaunisala talega ni kena vakatetei na veivuke oqo vei ira tale eso. Na uto ni rai ena vuli oqo e kau mai na veivuli oya. Kevaka o raica ni veivuke vei iko na veika o wilika eke, qai veitaratara ki na iSoqosoqo ni Taba iVola Tabu ena vuku ni kena kilai na sala e dau muria na Kalou me walia kina na mavoa ni yalo ena kauveilatai kei na sala e rawa ni veivuke kina na lotu.

Na lesoni oqo e a vola taumada ko Talatala Wesley Neal. Sa tiko na vakanuini ni na yaga sara vakalevu na Vuli oqo e na dela ni gauna eda sa sotava tiko oqo. Me vakalagilagi na Kalou ena vitu na Lesoni sa vakarautaki koto oqo.

Komiti ni Macawa ni Vola Tabu



Lesoni 1 – Moniti “Ni sa Kaukauwa mai na Cava ni Bula ”

Vakatekivu 37:17b-28;

Maciu 2:13 -18

Ni sa yaco mai na leqa, na veika e tukuna na iVola Tabu era veisemati vinaka. E sega ni kainaki “kevaka” ena yaco mai na leqa vua e dua, ia e tukuna ga “ni sa” yaco mai na leqa. Ni sa tarai keda na leqa, e veiba na lomada ka da vakataroga, “Na cava e yacovi au kina?” se “Baleta na cava e yaco kina ena gauna oqo?” Ia, e vakavuqa me dau qai sauma vei keda na i Vola Tabu vakaoqo ne, “A cava me segai kina?”

Na rarawa se leqa ena tara kece na noda bula, vei ira era talaidredre kei ira e sega na nodra cala. Me vaka nai tekivu ni talanoa kei Josefa e nai Vakatekivu, e sega ni vakaraitaki ni sega na nona cala (wilika na Vakatekivu 37:1-11 mai na nodratou rai na tuakana!), ia e sega ni dodonu me a kune rarawa mai vei iratou na tuakana dauvuvu. E vakakina vei Jisu kei ira na gonelailai era vakamatei mai Peciliema; E dodonu li na ka e a cakava ko Eroti ena dela ni nona cudru kei na vuvu?

Nai Vola Tabu e rawa ni vakatakila vei keda na vuna eso eda sotava kina na cagilaba, se vakacalaka, se veivakalolomataki se leqa e tara na noda bula, ia sa dusia ga vei keda e duabulu na ka sa vakayacora oti kina na Kalou. Ni sa tala mai kina na Luvena me mai mate ena kauveilatai ka tucake tale mai na mate. Ena sala qo, e vosota kina na noda i valavala ca na Kalou, vakabulai ira sa vakamavoataki na yalodra, ka vakamalumalumutaka na ca ena vuravura oqo. Me vaka e tukuna na qaqanisere makawa, “Mo ni tu raviti au ni sa tubu cake na cava ni bula.”

Ni raici lesu na gauna e cavuti tiko ena Vakatekivu, au vakabauta ni na tukuniyalotaka o Josefa ena gauna ni nona qase, ni a tiko kei koya na Kalou ena tobu ni wai maca ka ratou viritaki koya kina na tuakana, kei na sala balavu ki Ijipita, kei na veigauna dredre kece ena nona i lakolako. Sa bolei na noda bula me na vakaoqo talega na noda tukuniyalo ni da curuma yani na veigauna dredre ka vakanamata ki na vosa ni yalayala ni Kalou.

Taro

1. Na gauna cava o sa bau taroga kina na Kalou vakaoqo, “A cava li na vuna?”
2. O sota kaya vakacava na nona veivuke na Kalou ena nomu leqa/dredre?
3. Mai na leseni ena Vakatekivu, na sala cava e yaco me i vakaruru ka vuni kaukauwa kina nei Josefa na Kalou?



Lesoni 2 – “I Jiova, Ena Vakaevei na Keda Dede?”

Vakatekivu 39:1-15;

Marika 9:14-29

Ena gauna sara ga e vaka me sa via rawarawa kina vei Josefa na bula, o ya na gauna e vakila kina na veivakarautaki ni Kalou me rawata vinaka na nona bula e Ijipita, a qai basika tale mai na leqa. E dina ga ni a qarava vinaka na nona turaga o Josefa, ia e a sotava tale na veika dredre eso ka sega ni tarova rawa. Na garogaro i wati Potifa na nona turaga kei na nona veibeitaki vakailasu e vakavuna na nona vakalesui o Josefa ki na dua tale na qara.

Se vakasamataka mada na tamai koya na gone ka a sotavi iratou na tisaipeli ena ruku ni Ulunivanua ena Marika 9:14-18. A sa lomana vakalevu na luvena tagane ka kauti koya yani kina vei iratou na tisaipeli me ratou vukea. Ni tarogi koya o Jisu se cava na dede ni gauna e yacovi koya kina na leqa oqo, a sauma vakaoqo, “Me tekivu sara mai ni se gone lailai voli. Sa dau vakavuqa na sasaga ni yalo velavela me vakamatei koya.” Ia, e ratou a sega ni vukei koya rawa na tisaipeli. Mai na veivakabulai ka a nuitaka voli mai, a mai tini wale o tama ni gone ena dua na veileti ena kedratou maliwa na tisaipeli (luvuci ena madua) kei ira na Daunilawa.

Ena vuqa na gauna, e dau dede toka na kena tarai keda na leqa se rarawa. E vaka me sega ni sotavi na noda leqa mai na veika eda vakanuinui taumada kina. Na iwali ni leqa eda nanuma e qai berabera ni yaco mai, ka tubu cake na noda nuiqawaqawa. E tarai keda tale e vuqa na leqa ka yaco me vakalevu sara. E vaka me sa buwawa talega na sala me rawati kina na bula.

Na vosa ni yalayala ni Kalou e sega ni kaya vakaoqo ni na vukei na noda leqa kece ena gauna ga eda masuta kina na Kalou. Ia sa tiko voleka sara me vukei keda ena gauna ni leqa se rarawa. E a tiko vata kei Josefa na Yalo i Jisu ena gauna a beitaki kina vakailasu, ka a tu tikivi koya ena gauna sa tasogo tale kina na katuba ni valeniveivesu. E a vakarota na yalovelavela ko Jisu me biuta na gone ka taura cake na ligana ka vakaduria. Ena nodratou tarogi Jisu na tisaipeli se cava na vuna e ratou sega ni vakabula rawa kina na gone, a vakavulici ratou vakaoqo o Jisu ka kaya, “Na masu ga ena vakatalai tani rawa kina o ira oqo.” Io, na domo ni nona

tagi na Daunisame, “I Jiova, ena vakaevei na kena dede?” (Same 13:1) e masu ni vakabauta titobu. O ira era masu vakaoya era sa vakanuinitaka na nodra leqa vua na Kalou baleta ni ra sa vakabauta ni rawa vua me vakabulai ira.

Taro

1. A cava o nanuma ni vakasamataka tiko o Josefa ni sa beitaki koya vakailasu o wati Potifa?
2. Na gauna cava o sa bau masu kina vaka oqo vua na Kalou, “Turaga, ena vakaevei na keda dede?”
3. A cava so na gauna e cabo masu kina vakaoqo o Jisu?

Lesoni 3 – Na Sala Balavu Ki Na Bula Vinaka

Vakatekivu 40:1-23;

Joni 5:2-9a

Eda dau nanuma ni sala ni kena vakalesui na bula me vinaka tale e gaunisala malumu ka totolo me vakalesui keda lesu mai na dredre eda sotava ki na veivakavoui eda vakanuinitaka. Na kena dina sai koya, ni dau tautauvata kei na vuqa na sala eda draiva tiko kina: sinai ena qara kei na cakacaka vakavo, vuqa na ile su ni sala sega ni namaki kei na iwavoki vakasauri.

A cava na vuna o nanuma ni a yabaki 38 kina ena batinitobu mai Peciseita na tamata oya? Eda sa kila na vuna e tukuna vei Jisu me baleta na nona tiko vakabalavu ekea (t.7) ia na cava tale eso na vuna o nanuma? A cava e rairai vakavuna na nona tiko ga ena batinitobu mai na nona gauna ni gone me yacova ni sa qase?

E rairai na rawa ni raici nai sau ni taro oqo mai na i talanoa kei Josefa. Eda wilika nikua e dua na gauna latusobu ena i lakolako ni bula nei Josefa. Ia ena gauna ni nona tiko e valeniveivesu nia beitaki vakailasu, sa soli tale vua e dua nai tutu mai loma. E tomana tiko ga na Kalou na nona solia tiko vua na i solisoli ni kilaka ka vakacerecereya tiko ga na Kalou o Josefa ena vuku ni solisoli oqo (t.8b) Ia ni mai cava nai talanoa nikua sa guileca tale o Josefa - me rua tale na yabaki!

E a rawarawa sara vei Josefa me sa yalolailai! Ke a rawarawa sara vei Josefa me rai lesuva na 38 na yabaki ka soli ulubale ena vuku ni balavu ni gauna ea kaivesu tu kina! Ia ea sega ni yaco oqo vei koya. E vakananuma ga nona yalodina na Kalou vei koya ena veigauna sa sivi ka vakanuinui ni na yalodina tale vei koya ena veisiga ki liu.

Na sala ni veivakabulai e dau cici balavu ena so na gauna, ka dau cici curuma na “butobuto loaloa sara” (Same 23:4) ia e sega ni biuti keda se laivi keda na Kalou, veitalia na ca ni gaunisala. Ia na Kalou sa cakacaka tiko ga me kauti keda ki na dua na i tekitekivu vou ka na yaco mai ni sa mavo na mavo ni yaloda.

Taro:

1. Nai talanoa cava mai na nomu veiyabaki sa oti e vukei iko mo lako curuma na gauna ni dredre?
2. O bau kila beka e dua na tamata e vakataki koya na tamata ena batini silisili mai Peciseita
3. Na cava e dau veivuke vei ira sa yali na nodra vakanuinui?



Lesoni 4 – Vakanuinui Vua na Kalou e na Lolosi

Vakatekivu 41:14-28

Roma 5:1-5

Ni oti e vica na yabaki ena valeniveivesu ena cala ni beitaki vakailasu, a rairai tu na yalo ni vakusakusa vei Josefa me sereki mai kina. Ia ni sa yaco mai na gauna me rau sota kina kei na tamata ka tu vua na kaukauwa me sereki koya, ea duatani tale nai vakarau ni nona veitalanoa. Eda namaka ni na vosa vakamarimari vua na tui me rawa ni sereki koya kina na tui me galala. Ia eda raica ni vagolea tikoga na rai ni tui vua na Kalou. Vakatolu e nai talanoa ogo (tk 16, 25, 28) e dusimaka kina o Josefa vua na tui ni Kalou ka sega ni o koya nai vurevure ni vuku kei na kila-ka.

Ni da dau vakayalia e dua na bula se dua na ka e talei vei keda, eda dau sota kaya na lolosi (grief). Ena gauna ni noda lolosi ena rawa ni da dau temaki me da muria na sala rawarawa se totolo ni veivakacegui, ka sega ni nuitaka na Kalou me walia na yalo galili kei na mavoa. Mai na noda vakalaiva meda lako curuma na veika me vaka na caki, na cudru, kei na so na gauna ni yali na vakanuinui ka ra tiki ni sala ni nona vakabula na yalo e mavoa na Kalou, eda dau temaki me da vakadromuca na noda rarawa kei na mosi e na yaqona ni valagi se yaqona ni Viti, se meda vagaluya na noda rarawa ena noda tukuna vei keda ni da sega ni vakila na mosi kei na rarawa kevaka meda vakalevutaka na noda vakabauta.

Vakatautauvatataka mada na noda dau via taura na sala lekaleka ni da sota kaya na rarawa, vata kei na matua ni bula nei Paula ena nona sotava tiko na lolosi. E dua o Paula e kila na bula rarawa kei na vakayali ni ka ena nona bula ena vuku ni Kosipeli, ia ena nona i vola ki na soqosoqo lotu mai Roma, e vosa mai ena titobu ni nona vakabauta. “Ni da sa kila sa tubu na dauvosota mai na ka rarawa; na dauvosota sa kauta mai na veivakadonui ni Kalou, kei na nona veivakadonui sa tara cake na noda i nuinui” (Roma 5:3-4). E kila tu o Paula ni sala ni bula mai na lolosi e sega ni lako mai na vosa ni yalayala e veivakamarautaki se mai na kena vakanunutaki na mosi, ia mai na kena nuitaki na Kalou ena noda gauna ni lolosi.

Kevaka o tiko ena valeniveivesu, se rarawataka tiko na yali ni dua naka, se sota kaya tiko na dredre, mo nanuma vinaka tiko, “Sa lako mai vei Jiova na noqu i vukevuke” (Same 121:2). Me vaka e tukuna vei keda na Roma 5:1-5, Kevaka eda nuitaka na Kalou ena noda rarawa se lolosi (grief), ena sovaraka mai na Kalou na nona loloma ena yaloda mai na nona Yalo Tabu.

Taro

1. Na gauna cava ena nomu bula osa bau sotava kina na lolosi?
2. O sa bau temaki oti mo muria na sala takoso ena nomu lolosi?
3. E veivakauqeti vakacava vei iko na vosa nei Paula ena Roma 5?

Lesoni 5 – Solia Vua na Kalou

Vakatekivu 42:5-24

1Pita 5:6-11

E dua na i taletale ni sere vakavavalagi era dau lagata na gone e vaka koto oqo: “Cast your burden unto Jesus for he cares for you!” E dina ni levu vei keda e kila ni kau mai na veivosa oqo e nai vola na 1 Pita, ia eda dau guilecava na vo ni vosa ni yalayala e kau mai kina nai yatu vosa oqo. Eda sega ni dau solia wale na noda icolacola vua na Kalou baleta ni kauwaitaki keda (t 7), ia eda vakataqara vei koya na noda rarawa ena veivakadeitaki ni Kalou e sinai ena yalololoma ena vakataucokotaki iko ka solia vei iko na tudei kei na kaukauwa kei na yavu dei” (tk 10).

Nai naki ni Kalou ena vuku ni dredre era yaco mai ena noda bula o ya me da sega walega ni vosota, ia mera vakataucokotaki keda talega ka solia vei keda na tudei, na kaukauwa kei na yavu dei. Niu dau vakasamataki ira era sa qase cake ka’u qoroya na nodra bula ena 15 na yabaki ni noqu veiqaravi ena lotu -- o ira ka’u vakanuini ena kaukauwa ni Kalou ni na yaco meu na vakataki ira ena dua na siga, e tiko e dua na ka era tautauvata kina. O ira taucoko era sa lako curuma oti eso na dredre lelevu se yali ena nodra bula ka ra sa yaco me ra tamata kaukauwa ka tamata yalodina ni ra sa lako sivita.

Ena noda wilika nai talanoa ena i Vakatekivu, oqo na mataqali tamata eda sa raica ena bula nei Josefa, ni sa curuma bula dredre ena veiyabaki sa vosota voli. Me vaka na noda lesoni wiliki nikua, ni sa tu o Josefa ena itutu levu mai vei iratou na tuakana, ka se sega ni guilecava o koya na nodratou a vakalolomataki koya. Na bula ni sauma lesu na nodratou veivakalolomataki, ea rawarawa sara me sauma lesu vei iratou, ia e sauma vei iratou ena yalololoma (tk. 18) Ea rawa sara vua me sauma lesu na veivakararawataki vei iratou na kena meca kei na nodratou matavuvale, ia e yalololoma o Josefa vei ratou ka solia vei iratou na kakana me ra lai bula talega kina na nodratou vuvale. Na nona yalololoma vei iratou sa vukea talega me ratou veivinakati tale kei iratou na tuakana. Na dredre eda sota kaya, e rawa ni vakayacora vei keda meda cudrucudru ka gaga, se na vakayacora vei keda

meda yalololoma ka dau veivosoti. E vakaraitaka o Josefa na vua ni noda solia vua na Kalou na noda leqa.

Taro

1. Ena Vakatekivu 42:24, e sa luluvu ka drodro vakayauyau na wai ni matai Josefa. Vola mada ena nomu vosa ga na ka e rairai vakila e lomana.
2. Ni da tukuna vei ira na tamata mera vakalaiva ka biuta vua na Kalou, a cava na kena i balebale?
3. Na dredre/rarawa cava e tiko vei iko ka na yaga vei iko mo solia vua na Kalou?

Lesoni 6 – Vosota Ira Na Nomu Meca

Vakatekivu 45:1-15;

Kolosa 3:12-17

E se sega ni taucoko na cakacaka ni veivakabulai ni Kalou ena yalo ni tamata ena noda solia vua na noda mosi kei na leqa/rarawa. E tiko tale e dua na i kalawa dredre me da na kalawa kina. Ena daku ni noda solia vua na Kalou na noda rarawa, e tiko talega na bolebole vei keda me da vosoti ira na noda meca.

Na wainimatai Josefa ena italanoa oqo e dusia tiko ni sega ni ka rawarawa na veivosoti. Ena itekivu ni wase oqo, ea tagi ena domo levu o koya ka ra rogoca rawa na kai Ijipita a vakatalai ira e tautuba o koya, ka ra vakataroga se cava sa yaco tiko (t.2) Ena i cavacava ni lesoni, e se tagi tikoga o Josefa ena nona mokoti Penijamini na tacina kei iratou vakaadua na tuakana (t.14-15). Eda rawa ni kaya ni drodro tiko beka ga na wai ni matana ena gauna sa tukuni koya kina vei iratou, kei na veika sa cakava na Kalou. Na qeqera ni wainimatana e sega walega ni baleta na nona yalo luluvu, sa baleta talega na dredre ni nona vosoti ratou na kena meca ka ratou tuakana.

Na veivosoti me vaka e laurai eke vei Josefa, e sega ni vakatautaki mai na nona sa veivutuni o koya e caka cala vei keda. E ratou a galu tu ga na veitacini ena gauna a tukuna tiko kina vei iratou o Josefa na veika a sa yaco. Ia ni oti oya, a sa vakila na galala ni lomana. Oqo e dusimaka vei keda ni veivosoti e dua na ka e yaco ena keda maliwa kei na Kalou, ka vaka kina vei keda kei ira na noda meca. Me vaka e kaya na Kolosa 3:13, me da dau veivosoti me vaka sa vosoti keda oti na Karisito.

Na kaukauwa ni tucake tale e cakacaka vei keda (Efeso 1:19-20) ni da raica, ni da sa leqa tu, ia eda se vosoti ira ga era vakacacani keda. Oqo ei vakadinadina ni sa yaco tiko na veivakabulai e na yaloda mavoa.

Taro

1. A cava e dredre kina na vosoti ira na noda meca?
2. A cava e dau vakadredretaka na noda ciqoma na veivosoti?
3. E veivuke vakacava na tucake tale mai na mate nei Jisu ena noda vosoti ira na tani?



Lesoni 7 – Bula Tiko e na Vakacegu ni Kalou

Vakatekivu 50:15-21;

Same 46

E dua na tikina bibi ena i talanoa kei Josefa e dau vakawaletaki tu. Ni da dau wilika na i talanoa nei Josefa vei iratou na tuakana, na nodaratou sasaga me ratou vakalolomataki koya, ia sa vakayagataka na Kalou me basika kina na ka vinaka, (Vteki 50:20) eda dau sega ni taroga se cava na dede ni gauna e taura ni bera ni qai cavuti nai tukutuku oqori vei iratou na tuakana. E sega ni taura e vica ga na macawa se vula se yabaki. Ni da vakawilika vinaka na i talanoa, e taura e 17 na yabaki me qai mai veivinakati tale o Josefa kei iratou na tuakana.

E dua na ka vinaka ni sega ni ka me da waraka sara me mavo na mavoa ni yaloda me da qai sotava na vakacegu ni Kalou ena noda bula. Kevaka me vaka oya, ena sega beka ni da na yacova nai tinitini ni cakacaka ni veivakabulai e via cakava vei keda na Kalou. Ia na Same 46 e vakananumi keda me da kila ni sa tiko vata kei keda na Kalou ena noda “veigauna ni rarawa” me vaka ga na nona tiko vata kei Josefa ena 17 na yabaki oya. Kevaka eda sa mani vakamura na sala e dusimaki tiko vei keda ena i ototi ni lesoni oqo, e “noda i drodro ka kaukauwa” na Kalou, o koya ka kacivi keda “me da tiko lo ka kila ni sai koya na Kalou”(Same 46:10).

Nai ototi ni vosa nei Jisu vei iratou na nona tisaipeli ena bogi ka soli yani kina, ea vakadeitaki iratou ena nona yalataka na nona vakacegu ni na tiko vata kei iratou ena nona YaloTabu. E sega ni soli me vaka e solia o vuravura, ia oqo ei solisoli ni nona tiko vata kei keda na Kalou (Joni 14:27). Ena nona tiko oqo, sa rawa ni da bula ena vakacegu ni Kalou veitalia na lako mai kei na lako yani ni veika dredre, se ena gauna e vukea tiko kina o koya na mavoa ni yaloda.

Sa noqu masu ni na veivuke na veivuli oqo vei iko me tuberi iko vakavoleka mo kunea na vakacegu ena nomu bula. Ni sa oti na cagilaba kei na veileqa tubu koso tale eso, o vuravura e gadreva me raica nai vakadinadina ni vakacegu ni Kalou e uasivia na v eika kecega. Me yaco vei iko kei na nomu i vavakoso ni sa vauca na mavoa ni yalomu na Kalou ka qusia tani na wainimata kecega.

Taro

1. Raica Iesu nai tosotoso nei Josefa ena loma ni 17 na yabaki. E sotava vakacava na Kalou me nonai drodro ka nonai vakaukauwa ena gauna ni rarawa?
2. E sa bau vakananumi iko oti edua mo “tiko lo ka kila ni sai au na Kalou?”
3. A cava o rawa ni cakava mo bula vakalevu kina ena nona vakacegu ni Kalou nikua?